

## *Nuusbrief van die Peter Henrich Henning Familiebond*

Wingerd 205  
Theewaterskloof Landgoed  
Villiersdorp

Posbus 121  
Villiersdorp  
6848

Tel en Faks: 028 840 0113

E-pos: [olie4@henning.org](mailto:olie4@henning.org)

*Verskyn vier keer per jaar: Februarie, Mei, Augustus en November*



**b5.c1.d5.e9.f1. Daphné Olivier (gebore Henning, gedoop Lessing) dans op haar 90ste verjaardag met hulle predikant**

## **Die verhaal van Daphné Olivier (gebore Henning)**

Daphné Olivier (gebore Henning) het op 8 April 2015 negentig jaar oud geword. Sy het groot geword onder die van Lessing, maar toe sy in 1942 in die huwelik wou tree, wou die predikant wat die huwelik sou voltrek, eers haar geboortesertifikaat hê, voordat hy die huwelik kon voltrek. Toe sy hierdie sertifikaat bekom, kom sy vir die eerste keer in haar lewe agter dat sy inderwaarheid as 'n Henning baba gebore en geregistreer is. Slegs haar biologiese ma se name word op die geboortesertifikaat verstrekk. Sy is skynbaar as 'n pap babatjie deur 'n Lessing egpaar aangeneem.

Daphné het dus maar altyd gewonder wie werklik haar biologiese ouers was, maar was nooit in staat om uit te vind nie. Sy en haar man, Jacobus Andries Botha is op 2 Mei 1942 getroud en het vyf kinders gehad voordat hy in 1961 oorlede is. Sy is later weer getroud met 'n ou skoolvriend, Jan Hendrik Christoffel Olivier.

In die aanloop tot haar negentigste

verjaardag het haar kinders besluit om as 'n verjaardag geskenk te probeer vasstel wie werklik haar biologiese voorsate is. Hulle het sommer gou uitgekom by die Henning Webwerf op Internet en by Bondsektaris, Olivier Henning. Met die inligting wat van die geboortesertifikaat verkry is, kon ons met 'n groot mate van sekerheid bepaal waar Daphné by die Henning Geslagsregister inpas.

Ons begin haar verhaal by die Bethulie Konsentrasiekamp gedurende die Anglo-Boere-oorlog, waar verskeie Henning vroue en kinders en selfs mans aangehou is.

Die Bethulie konsentrasiekamp is tydens die Anglo-Boere-oorlog op 22 April 1901 opgerig. Dié “helkamp” soos Genl Christiaan de Wet na die kamp verwys het, was een van die kampe met die hoogste sterftesyfers per capita. Die lewe in die konsentrasiekampe – veral die “meerkatdorp”, soos die Bethuliekamp genoem is – was 'n volgehoute stryd teen die dood. Ds H J C Becker skryf in sy dagboek: “Twaalf begrafnisse in die oggend en sewe in die middag in die Bethulie kamp .... dit was genoeg om die hartste hart te breek. Vir enige minute moes ek dikwels eensaam ween voor ek kon preek”.

So het 1 713 Boere vrouens en kinders, waarvan 1 311 kinders jonger as 15 jaar was, in minder as 'n jaar se tyd hier gesterf. Hiervan was 13 Henning kindertjies en twee Henning vroue.



Maar ons Boerevrouens laat hulle nie onder kry in hierdie benarde omstandighede nie. 'n Groep vroue in die Bethuliekamp het Matt 10:29 as oorlewingsleuse gekies, waaraan hulle naastiglik vasgeklou het — ***“Is twee mossies nie vir ‘n sent te koop nie? En tog sal nie een van hulle op die grond val sonder die wil van julle vader nie”.*** Hierdie vroue het hulle later beywer om hul simbool van hoop en geloof op Suid-Afrika se kleinste munt te laat uitbeeld. In 1923 het Genl Jan Smuts, op

aandrag van mev Tibbie Steyn, ingestem en is twee mossies op die Suid-Afrikaanse kwartpennie geplaas. Wie onthou nog hierdie ou kwartpennies met die twee mossies?

Die Bethuliekamp was egter nie net 'n doodskamp nie. Kort voor die beeindiging van die oorlog – op 9 Mei 1902 word hier 'n Henning dogtertjie gebore vir die ses-en-sestigjarige b5.c1.d5. Jan Andries Henning \*6-1-1836 en sy jong tweede vroultjie, Anna Sophia (gebore Roux) (gebore ongeveer 1860). Hierdie bondeltjie vreugde kry die name Lea Magdalena. Jan Henning was te oud en swak om op kommando te gaan en is self in die konsentrasiekamp aangehou.

Jan Andries Henning het die smart deurgemaak dat een van sy dogters uit sy eerste huwelik, Johanna Elizabeth (getroud Pretorius) en drie van sy kleinkinders (twee gesinne) in die Bethuliekamp gesterf het. Gelukkig het dinge teen die einde van die oorlog in die konsentrasiekampe begin verbeter, nadat Emily Hobhouse groot druk op die Britse regering begin uitoefen het en is die kleine Lea Magdalena in meer draaglike omstandighede gebore.

Met die beeindiging van die oorlog kon al die aangehoudenenes huistoe gaan. Daar kan aanvaar word dat Jan Henning en sy vrou Anna Sophia, met hulle babatjie, net met hulle klere en die paar goedjies wat hulle in die konsentrasiekamptent gehad het, huistoe moes loop. Hulle plaas het nie meer bestaan nie — alles was afgebrand en/of verwoes. Al die veë is doodgemaak, landerye vernietig. Mens kan dus aanvaar dat hulle maar 'n heenkome op die dorp of elders gaan soek het.



***Die herboude klipstapel wat die vroue wat in die Bethulie konsentrasiekamp aangehou is, na die oorlog opgerig het, met 'n replika van die engelbeeld wat gemaak is. Die fondse vir die maak van die matrys is deur die Henning Familiebond geskenk***

Lea Magdalena Henning, of Lena soos sy genoem is, het soos alle normale dogters na die oorlog grootgeword onder baie moeilike omstandighede, met baie min geriewe. Onthou! na die oorlog het die burgers van die ou boererepublieke letterlik niks oor gehad nie. Hulle plase was in totaliteit vernietig. Hulle het hul lewens egter stadig maar seker weer begin herbou en hulle het steeds geglo aan die oorlewingsleuse wat hulle in die Bethuliekamp aangeneem het – “Is twee mossies nie vir ‘n sent te koop nie? En tog sal nie een van hulle op die grond val sonder die wil van julle vader nie”

Teen die einde van 1924 tref ‘n ramp vir Lena – sy word swanger ..... sonder dat sy getroud is! In daardie dae was dit die grootste sonde en vernedering wat ‘n jonge dogter – Lena was darem al 22 jaar oud – en haar familie kon tref. Haar pa was reeds oorlede. Hy het in 1914 gesterf. Sy moes dus alleen die besluit neem, wat om met die babatjie te maak. In daardie dae was dit totaal en al ongehoord dat ‘n ongehude moeder self haar kindjie grootmaak.

Sulke babas is deur die bank vir aanneming beskikbaar gestel. As ‘n diep gelowige mens moes sy ‘n besluit neem, wat heeltemal indruis teen haar gewete. Toe hierdie babadogtertjie op 8 April 1925 gebore word, is sy dus dadelik vir aanneming aangebied. ‘n Lessing egpaar (Louis Stephanus Lessing en sy vrou, Clara Isabella Prinsloo) neem die babadogtertjie aan en doop haar met die naam, Daphné. Hulle het Daphné soos hul eie kind grootgemaak en hierdie Daphné het onlangs negentig jaar oud geword.

Daphné word groot op haar aanneem ouers se plaas naby Nancefield, Johannesburg. Soos reeds gemeld, is sy op 2 Mei 1942 te Johannesburg getroud met Jacobus Andries Botha. Hulle het vyf kinders gehad – twee seuns, Jacobus Johannes Mathysen Botha, die oudste kind en Louis Stephanus Botha, die jongste kind, met drie dogters in die middel: Clara Isabella (getroud Van Zyl), Sophia Elizabeth Frederika (getroud Wiesner) en Jeanetta Priscilla (getroud Liebenberg).

Na haar man se dood in 1961, is Daphné in 1969 weer getroud met Jan Hendrik Christoffel Olivier – ‘n ou skoolmaat wat sy jare voor haar eerste troue geken het. Hy is egter in 1989 oorlede. Vandag woon Daphné in Potchefstroom en geniet nog steeds baie goeie gesondheid.

# Geskiedenis van 'n Maclear Henning gesin



**b7.c8.d5. Gert Frans Henning \*10-9-1864, sy vrou Susannah Catharina (Sannie) (gebore Maartens) en die eerste agt van hulle elf kinders. Heel agter: e1 Olivier Johannes (Tok) \*16-4-1890. Middel: e4. Adriaan Lourens (Adriaan) \*4-11-1895, vader Gert, e3. Gert Frans (Frans) \*9-1-1894, e2. Hendrik Joachim (Hendrik) \*5-2-1892. Voorste ry: e6. Robert Mathys Daniël (Bob) \*22-6-1900, e7. John Brown (John) \*17-8-1902, e8. Elizabeth Magdalena (Bettie) \*29-9-1904, moeder Sannie. Heel voor: e5 Filipe Daniël (Daantjie) \*7-5-1898**

John Brown Henning wat op 17-8-1902 gebore is, was die sewende seun in 'n gesin van elf kinders. Toe hy ongeveer 8 jaar oud was sterf sy pa aan maagkanker. Sy ma, Sannie het daarna besluit om met haar kinders van hulle plaas, Mertoun in die Rhodes distrik te verhuis na die plaas Risler, in die Maclear distrik. Die gesin het met twee waens oor Naudesnek in die Drakensberge afgetrek na Maclear. Die Naudesnek pas is tot vandag toe nog die hoogste bergpas in Suid-Afrika. John se oudste broer, Tok (Olivier) het agtergebly op Mertoun. Sy ouer broer, Hendrik het saam met ma Sannie en die vier jongste kinders gery en broer Frans was in beheer van die ander wa met die ouer seuns

van wie John Brown die jongste was. Frans het baie jare later vertel dat terwyl hulle nog so gery het, het John na hom gekom en gesê dat hy honger was. Frans het 'n gevoel van magteloosheid ervaar, want daar was geen kos by hulle op die wa nie, maar toe hy so opkyk na die berg, sien hy 'n klomp braambosse vol ryp brame. Hy het die wa net daar gestop en die klomp seuns het almal eers heerlijk brame ge-eet.

Ma Sannie was 'n klein fyn vroultjie en om 11 kinders alleen groot te maak in een van die mees onherbergsame dele van Suid-Afrika, moes 'n oorweldigende moeilike taak gewees het. John en sy broers het waarskynlik dus van jongsaf geleer om selfstandig en innoverend te wees.

Toe John op ongeveer dertigjarige ouderdom getrou het, het hy reeds sy eie afdelingswinkel gehad. Die volgende storie wat John, met so 'n stoute laggie vertel het, illustreer die aard van sy huwelik met Aletta Maria van Straten goed. "Nadat ek met julle ma getroud is, het ek die winkel se naam verander na Henning&Co. Die mense vra my toe of ek 'n vennoot het. Ek sê toe: Ja, julle ma was die "company!" Sy het dan ook die damesafdeling van die winkel blykbaar baie effektief bestuur.

Later het John die plaas Confluence (ook in die Maclear distrik) gekoop - 'n verwaarloosde plaas met 'n vervalle huis. Deur die jare het hy en sy vrou, Aletta die plaas met goeie sorg en bestuur tot 'n spogplaas opgebou. Die uitgetrapte veld het herstel en die erosieslote is opgevol. In die plek van die vervalle huis is 'n mooi sandsteenklip huis gebou. Die werf is omskep in 'n landskap met grasperke, terrasse, bome en struie en 'n tennisbaan waar vriende dikwels oor naweke gekuier het. Later het hy nog twee plase aangekoop.

John was ook nou betrokke by die gemeenskap van Maclear. Sy winkel is oorgeneem deur die landboukoöperasie maar hy en Aletta het aangebly as direkteure. Hy was ook baie aktief betrokke by die kerk as kerkraadslid en sonderagskool-organiseerder.

Dit was vir sy gesin 'n swaar slag toe hy op 57 jarige ouderdom aan kanker oorlede is. Hulle het as gesin na sy dood egter geen finansiële gebrek gely nie, aangesien hy sy vrou agtergelaat het met 'n plaas sonder skuld en nuwe voertuie en implimente. Aletta, wat altyd gedeel het in sy boerdery, het besluit om met die boerdery voort te gaan totdat sy seun (ook John Brown) wat 12 jaar oud was tydens sy dood, die boerdery kon oorneem.

John Brown was 'n suksesvolle besigheidsman, maar sy kinders onthou hom as 'n mens met 'n sagte hart wat dikwels hulp verleen het waar daar nood was. Hy het sy werkers met respek behandel en goeie verhoudings met hulle gehandhaaf.

## **Noorweegse Henning Nasate besoek Suid-Afrika**

Ruth S F Landmark van Vegaishei, Noorweë, haar dogter Ann-Charlotte Andersen (getroud Torvildsen) en Ann-Charlotte se babaseuntjie Peder Henrich Torvildsen van Oslo, Noorweë het gedurende April 2015 in Suid-Afrika kom vakansie hou. Hierdie vakansie is spesifiek gereël omdat hulle geweet het dat hulle nasate van Suid-Afrikaanse families en spesifiek die Henning familie van Suid-Afrika is.

Ruth (gebore 1946) se oupa was vroeg in die 20 ste eeu 'n Noorweegse skeepskaptein. Hy was vir lang rukke in Oos-Londen gestasioneer en hier het hy sy toekomstige vrou, Wilhelmina Catharina Fowels (gebore Zurich) ontmoet. Sy was 'n dogter van Herman Zurich \*1858 en sy vrou b7.c8.d1. Martha Johanna Elizabeth Henning \*1857. Ruth is ook die suster van Ds Bjarne Fowels van Hjelmeland, Noorweë, wat 'n baie aktiewe lid van die Henning Familiebond is.

Hulle sou op 21 April 2015 terug vertrek het na Noorweë, dus het sy gereël dat hulle die vorige dag (20 ste) besoek aflê by die Hennings van Theewaterskloof in die Overberg — oorgesetsynde Olivier — en Charlotte Henning, Bondsekreteraris van die Familiebond. 'n Baie aangename en interessante dag het gevolg. Familiegeskiedenis is uitgeruil. Daar is politiek gepraat en dit was duidelik dat hierdie Noorweërs goed op hoogte is van die nare dinge wat op politieke gebied in Suid-Afrika plaasvind.



Dit was ook interessant om te let op die name van Ann-Charlotte se seuntjie — Peder Henrich. Dit is natuurlik die Skandinawiese ekwivalent vir die Duitse Peter Henrich en die Afrikaanse Pieter Hendrik. Hierdie knapie het dus 'n familienaam van sy Henning voorsate gekry



Ruth Landmark (links voor) en haar dogter Ann-Charlotte Torvildsen (regs) van Noorweë saam met Olivier en Charlotte Henning. Regs Ann-Charlotte se seuntjie Peder Henrich Torvildsen (18 maande) wat na die Henning stamvader, Pieter Hendrik Henning vernoem is



## Is hier 'n toekomstige Springbok skrumskakel?

Ek sit Saterdag 9 Mei 2015 en rugby kyk op TV. Dit is 'n wedstryd tussen Afrikaans Hoër Seunskool, Pretoria (Affies) en Grey Kollege, Bloemfontein — dit is natuurlik een van die hoogtepunte op die skolerugby kalender. Tydens die kommentaar is een van die name wat die meeste opduik, dié van Affies se skrumskakel, Divan Henning. Hy is oral by en is beslis een van die manne wat die meeste indruk maak!

Mense wat my ken, sal weet dat ek bykans alle Hennings in Suid-Afrika ken en as ek 'n spesifieke persoon nie ken nie, sal ek onmiddelik wil uitvind wie



b6.c1.d1.e9.f4.g1.h2.i1.j1 Divan Willem Henning \*13-2-1997 en sy boetie, Viaan \*23-9-2000 (j2)

hierdie persoon is. In die geval van hierdie Divan Henning, het ek hom nie op rekord gehad nie. Nou begin die speurwerk om hom op te spoor. Maandagoggend 11 Mei bel ek Afrikaans Hoër Seunskool, maar die sekretaresse sê beleefd dat sy nie enige gegewens vir my mag gee nie. Sy is bereid om die ouers te vra om my te kontak.

Ek is so trots op ons Henning ouers! Dinsdag 12 Mei kry ek 'n Vonkpos van Alet Henning, ma van Divan Henning, waarin sy navraag doen wat se informasie ek op soek is na. Ek verduidelik breedvoerig. Nie lank daarna nie stuur Alet vir my al hul familie se gegewens en ek kom agter dat ons rekords net tot by haar man se ouers strek. Haar skoonpa is b6.c1.d1.e9.f4.g1.h2. Willem Henning en skoonma, Marlaine Antoinette (gebore Kitchenbrand). Alet se man is Douglas Henning. Ons kon dus hierdie hele familie in die Famiekroniek bywerk.

Divan Henning wat tans in matriek is, is duidelik 'n sportman van formaat, en dan bly sy leierseienskappe ook nie agter nie. Sy skool – en sportprestasies lui as volg:

1. Hoofseun van Bakenkop laerskool, Wierdapark, Centurion
2. Afrikaanse Hoër Seunskool, Pretoria – Leerlingraad en Koshuis leerlingraad
3. Skrumskakel O/12 en O/13 Cravenweek Blou Bulle span
4. Skrumskakel 1ste Span Witbulle vir twee jaar
5. O/16 Blou Bulle A span
6. O/18 Blou Bulle Akademiespan

Divan het ook 'n jonger boetie – Viaan Henning - wat ook goed presteer. Viaan was Onderhoofseun van Bakenkop Laerskool en op Hoërskool het hy vir Affies se O/14 en O/15 A-span Waterpolo gespeel, asook skrumskakel vir die O/15 C rugbyspan.



Die onderskrif van hierdie foto in Rapport lui: "Waterkloof se agsteman, Dylan Robinson, kry sy aangee weg – ondanks Divan Henning, skrumskakel van Affies, wat hom grond toe dwing. Affies was met 28 – 15 baas". Ongelukkig kan mens nie Divan se gesig op die foto sien nie.

## Elrike Henning van Tzaneen Presteer

b7.c8.d8.e5.f3.g3. Elrike Henning \*2-2-1991 dogter van Pieter Naude Henning en sy vrou Ingrid van die plaas Cashumi in die Tzaneen distrik het die graad B Ing (Chemies) aan die einde van 2014 by die NWU (Potchefstroom Kampus) verwerf. Die graad is tydens 'n gradeplegtigheid gedurende Maart 2015 te Potchefstroom aan haar toegeken. Elrike het hierna vir 'n pos aangesoek gedoen by die firma Deloitte Consulting. Dit is 'n firma van Raadgewende

Ingenieurs. Na 'n lang keuring – en evalueringsproses is sy uiteindelik gedurende Mei verwittig dat sy die pos gekry het. Sy het gedurende Julie begin werk.



**b7.c8.d8.e5.f3. Pieter Naude Henning en sy vrou Ingrid van Tzaneen en hul pragtige dogter, Elrike tydens haar gradeplegtigheid gedurende Maart 2015 te Potchefstroom, toe die graag B Ing (Chemies) aan haar toegeken is**



## Lenéle Henning wen weer goud!

Ons het in Nuusbrief nr 121 vertel van b7.c8.d8.e3.f4.g2.h1. Lenéle Henning wat in Oktober 2014 as lid van die Suid-Afrikaanse span aan die Wêreldkampioenskappe vir Aerobiese Fiksheidssport in Praag, Tjeggiese Republiek gaan deelneem het. Sy is natuurlik die dogter van Leonard en Chantéle Henning van Van Riebeeckshof, Bellville en 'n Graad 11 leerling. Ons het nou verneem dat sy op 27/28 Junie 2015 as lid van die Junior Proteaspan weer die goue medalje by die Suid-Afrikaanse Kampioenskappe verower het.

**Lenéle Henning van Van Riebeeckshof, Bellville wat weer op die 2015 Suid-Afrikaanse Kampioenskappe vir Aerobiese Fiksheidssport as deel van die Junior Proteaspan die gouemedalje verower het. Sy is die dogter van b7.c8.d8.e4.f2 Leonard Henning en sy vrou Chantéle en kleindogter van Bondsekreteraris Olivier Henning en sy vrou Charlotte**



## Troufototo



b5.c1.d3.e1.f2.g2.h1.  
Johannes Lodewikus  
(Johan)Henning van  
Milnerstr 21, Nelspruit  
het vir ons 'n foto van  
al sy familieleden wat by  
sy dogter, Suzanne se  
trou op 19 Julie 2014  
te Nelspruit  
teenwoordig was,  
gestuur. Johan se  
eggenote, Deanne is  
ongelukkig reeds in  
2012 oorlede.

**Troufototo van b5.c1.d3.e1.f2.g2.h1.i1. Suzanne Ann Henning \*7-10-1993 en Roan Du Plessis \*14-7-1992 op 19-7-2014 te Nelspruit. V.l.n.r. Keola van Biljon, 'n vriendin van Francois, oom Ockert Johannes Henning \*25-5-1969 (g2.h3.) en sy vrou Roline, oom Petrus Gideon Vlok Henning \*28-10-1966 ( g2.h2.) en sy vrou Jacqueline, bruidspaar Roan Du Plessis en Suzanne Ann Henning, pa Johannes Lodewikus Henning \*30-7-1964 (g2.h1.), boetie Johannes Lodewikus Freidrich Henning \*17-10-1997 (g2.h1.i2.), boetie Rohan Ernst Henning \*15-2-2000 (g2.h1.i3.), Francois Vlok Henning \*31-8-1993 ( neef g2.h2.i2.)**

## 'n Nuwe Henning Baba

b1.c3.d7.e9.f1.g2.h4. Daniël  
Stephanus Albertus (Danie)  
Henning \* 1-8-1978 en sy vrou, Liezel  
(gebore Van Wyk) van  
Bredasdorp in die Overberg het op  
27 Maart 2015 vir die tweede keer  
pa en ma geword, toe hul tweede  
seuntjie, Ivan te Hermanus gebore  
is. Danie is 'n professionele  
Lugvaart Ingenieur wat vir Denel  
werk en help vliegtuie bou vir die  
lugvaartbedryf en die Lugmag. Hy  
werk by die Denel Overberg  
Toetsbaan naby Arniston. Hier leef  
hy sy passie vir vliegtuie uit en  
ondergaan opleiding in beide ligte  
vliegtuie en sweeftuie. Hy is 'n  
gelisensieerde skermsewer en  
spandeer graag tyd in die lugruim van Agulhas en Hermanus




**b1.c3.d7.e9.f1.g2.h4. Daniël Stephanus Albertus (Danie) Henning en sy vrou, Liezel met hul twee seuntjies, die pasgebore Ivan (gebore 27-3-2015 en Nicolis \*15-5-2013**

# Sterftes



**Wyle oom Len Henning en ouma Ellie kort voor sy dood in 2001. Sy is nou op 18 Junie 2015 oorlede in die ouderdom van 92 jaar. Regs: Een van die pragtige troukoeke wat ouma Ellie gebak en versier het**



**Elsie Johanna Henning (voorheen Evert, gebore Van den Bergh) \* 11-9-1922** weduwee van wyle b7.c8.d8.e3. Leonard Henning \*24-7-1908 is op 18 Junie 2015 te Welkom oorlede. Sy was 92 jaar en nege maande oud ten tye van haar dood. Ouma Ellie, soos sy genoem is, was eers getroud met 'n Van den Bergh en na sy dood is sy getroud met die wewenaar Leonard Henning van Brakpan. Oom Len het op daardie stadium reeds twee vrouens oorleef. Toe hy in 2001 op 93-jarige leeftyd oorlede is, was hy en ouma Ellie al amper 20 jaar lank getroud. Na oom Len se dood het sy vir 'n



**Marlaïne Antoinette Henning (gebore Kitchenbrand \*15-1-1950 wat op 25 Mei 2015 oorlede is**

paar jaar lank in Brakpan bly woon, waarna sy by 'n vriendin, Sophie Venter in Welkom gaan bly het. Nadat sy 'n paar keer geval het en haar vriendin, wie self 87 jaar oud is, haar nie kon ophelp nie, het hulle vir haar 'n plek in die ouetehuis gekry.

Ouma Ellie en haar eerste man het twee seuns gehad, waarvan een reeds oorlede is. Sy word ook oorleef deur vyf van oom Len se kinders by sy eerste vrou. Sy sal altyd onthou word vir die pragtige troukoeke wat sy gebak en versier het.

Ons het ook verneem van die dood van **Marlaïne Antoinette Henning (gebore Kitchenbrand) \*15-1-1950** op 25 Mei 2015. Sy was die eggenote van b6.c1.d1.e9.f4.g1.h2. Willem Henning \*25-7-1948 en die ouma van Divan Henning oor wie ons ook in hierdie Nuusbrief berig. Ons het ongelukkig geen verdere besonderhede nie.

## Die Hennings en ESKOM

As gevolg van Eskom se kragonderbrekings en “LOAD SHEDDING”, moet baie mense deesdae vroeg kooi toe. Oor 9 maande gaan ons sekerlik babas kry met die volgende name:

Kers Grobler  
Vroegslaap Jordaan  
Blackout Dube  
Generator van Zyl  
Parafienlamp van Rensburg  
Pompie Primus  
Flits Botha  
Lampie Lamprecht  
Kilowatt Koster  
Kerswas van As  
Donker Jonker  
Gaslamp Aucamp  
Vuurhoutjie van Vuuren  
Nagskof van Niekerk



**....en laaste maar nie die minste....Hardehout Henning!!!!**

ns: weet nou nie of ons kole gooi of brandwyn suip uit frustrasie nie

## Geldsake

Baie dankie aan al ons lede wat oor die afgelope drie maande bydraes vir die Familiebond aangestuur het – veral diegene wat ruimskoots bygedra het. Soos gewoonlik vermeld ons die name van diegene wat R300.00 of meer bygedra het:

- Mark Henning en sy vrou Sheila van Bryanston, Johannesburg - R750.00
- Jozef (J H) Henning en sy vrou Lyndi van die Karibiese eilande – R500.00
- Dr P F J (Pieter) Henning van Marble Hall – R300.00
- Danie (DSA) Henning en sy vrou Liezel van Bredasdorp – R1 000.00

Ons wil ook hartlike dank uitspreek teenoor diegene wat met ‘n maandelikse debietorder bydraes lewer. Hier vermeld ons graag die name van Jan Andries Henning van Leraatsfontein, Witbank, Jan Hendrik Henning van Glenstantia, Pretoria, Past Antonie Henning van Wonderboom-Suid, Pretoria en Pieter (PJS) Henning van Ramsgate.

Vir baie jare reeds het die Familiebond ledegelde afgeskaf en laat dit oor aan alle lede om self te besluit of hulle, en hoeveel hulle wil bydra tot die instandhouding van die Familiebond. Ons moet egter meld dat die Familiebond se voortbestaan afhanklik is van die bydraes van ons lede, maar ons kan baie trots wees op die Henning familie, want die Familiebond se voortbestaan was nog nooit onder druk weens ‘n tekort aan fondse nie.

Alle bydraes kan direk in die rekening van die **Henning Familiebond** inbetaal word. Die besonderhede is as volg: **ABSA Bank Villiersdorp (tak 334 612), Rekening nr 2890 610 423**. Dit is ‘n tjekrekening. Vermeld asseblief te alle tye u lid nommer en/of voorletters en van as verwysing. U lidnommer verskyn op hierdie nuusbrief se koevert.

# Henning Aandenkings



Ons het nog verskeie aandenkings beskikbaar, wat pragtige verjaardaggeskenke sal maak, of sommer net as aandenkings gekoop kan word. U kan telefonies (028 840 0113 of sel 082 355 3801) of per E-Pos ([olie4@henning.org](mailto:olie4@henning.org)) bestel. Ongelukkig word posgeld volgens die gewig van die pakkie bygevoeg, dus sal ons u eers in kennis stel hoeveel die posgeld sal bedra, voordat u die geld in die Familiebond se rekening deponeer. Rekening besonderhede: **ABSA Bank Villiersdorp (tak 334 612); Rekeningnaam – Henning Familiebond; Rekeningnr – 2890 610 423 Vermeld u lidnummer of voorletters en van as verwysing**

1. Teelepels — R50.00 elk. **Pragtig as ‘n stel van ses of meer, saam met ‘n suikerlepel**
2. Suikerlepels — R54.00 elk
3. Lapelwapens — R30.00 elk
4. Mansjetknope — R100.00 stel. **Werklik pragtig! Kan met trots gedra of in ‘n vertoonkas vertoon word**
5. Skryfblokke (50 bladsye) — R30.00 elk
6. Henning CD — R125.00 elk (posgeld ingesluit)
7. Henning Familiekroniek – twee A4 grootte volumes van 233 en 204 bladsye — R450.00 (slegs 3 stelle beskikbaar) U kry ‘n Henning CD gratis saam met die stel boeke
8. Ons het ‘n Indeks van die inhoud van al 120 Nuusbriewe vanaf 1985 tot 2014 (30 jaar), beskikbaar. Dit beslaan 40 bladsye en kan teen R10.00 elk bestel word.